

畿輔通志卷一百六十八

略一百二十三 古蹟十五 陵墓四 保定一

保定府

清苑縣

周廉頗墓在縣西南十里廉梁里有祠堂

大清一統志

謹按太平寰宇記淮南道壽春縣引古今冢墓記廉頗葬

肥陵牛麓原掘泉三丈有一人衣服非常乃云我是肥陵

山神葬地當吾直道更宜移之不爾害汝掌事者懼而移

之謂之三鍬坑八公山一名肥陵山在壽春縣北四里則

墓應在今安徽壽州攷史記本傳廉頗在魏楚陰使人迎

之卒於壽春則古今冢墓記所云似與史合而今正定府

北及靈壽縣趙州東二十里郭里村之墓皆係訛傳未足

爲據又今清河縣西三十里及邯鄲縣東均有頗墓亦未可信也

宋三陵在縣東南御城西北僖祖曰欽陵順祖曰慶陵翼祖

曰安陵

謹案隆平集僖祖以儒學顯終於縣令歷永清文安幽都三邑順祖卽其子也少博學有時譽終於御史

中丞翼祖卽其子也少年慷慨有大志歷營薊涿三郡

太平興國中以祖宗陵墓所在

因置保州

大清一統志

謹按採訪冊云在城東仙人橋南

金須城縣令孟口墓在縣西

陵川集元郝經撰墓誌甲寅冬十有一月大雨雪經在杞戊

人方警孟君振文來曰余生而孤今三十有二年矣汲汲遑遑無他樹立先君子又不克葬何以爲人子今將由汴洛以求先君子遺櫬跋履山川蒙犯霜雪餓體凍膚而不顧箝口槁腸而不恤也遂去獲於洛之登封以歸而經亦北轅將會葬振文狀其事以請銘予哀其孤而嘉其志敘而銘之君諱某字升卿世爲保州人大父諱興字子昌登大定十九年進士第立朝蒞郡疑疑有政績時方右文而公復長於吏事故遂掇膺仕終振武軍節度使父某業進士有聲場屋母王氏

年甚富而失其天介然有守爰居以終伯父某登進士第擢藻筵秀再賁天庭鸞鳳翮翥遂爲國華終同知順天軍節度事君蚤失怙恃子於伯父旣生鼎腴能落紛華以自振三赴廷試特賜進士第去不就曰丈夫豈爲牛後乎以任子補保州錄事攝順天軍節度判官貞祐初北鄙用兵乘輿遷汴君爲供具截截有紀律民不擾而備上嘉之賜一官不受曰臣子養君父分也何以賞爲已而北兵屠保尸積數十萬磔首於城殆與城等君率遺民聚瘞之封十餘塚兵饑薦至託迹無所猶與州學生數人采稻食樵講肄不輟也河朔亡奔行在所授滕州司侯辟東平府元帥譏察徒須城令累官懷遠大將軍知國運日蹙不復中振遂不仕居偃師之大口志嘔氣阜不忍自棄遂感疾正大元年秋七月辛酉卒得年四十九寓殯於登封龍潭寺左三十二年乙卯夏四月某日葬於保州之西原從先塋也娶李氏同郡都轉運使李公之女賢明有介操自君之歿撫其孤襁負寇塲艱關百至卒底於成人以爲難能一子鐸卽振文也幼孤自知爲學通春秋節節山立雖落魄不偶而不滓世汙事業雖未見已能挺身數千里葬其先人以是而推識者知其必復其光矣銘曰先澤未斬國步已蹶本旣顛矣况乃枝葉埋志下泉於焉可揭君材不墮君節不折氣自杳杳行自嗟嗟有子而賢自復先業搖搖新楸偃偃穉柏三尺纍然是爲君宅文或不死萬古斯烈

金孝子田喜墓在縣境

劉因撰墓表略先人嘗手錄金源貞祐以來致死於其所天者十餘人而

武臣戰卒及閭巷草野之人爲多而予每覽之未嘗不始焉而慚傷若不自容中焉而感激爲之泣下終則毛骨悚然若有所振勵者故爲之訪諸故老揆諸小說攷其姓里增補而詳記之惟恐其事之不傳也近復得清苑孝子田君焉貞祐元年十二月十有七日保州陷盡驅居民出而君及其父與焉是夕下令老者殺卒聞命以殺爲嬉未及君之父者十餘人而君乃惻然欲代其父死遂潛往伏其父於下以兩手據地俛而延頸以待之卒舉火未暇省閬君頃腦中兩刀而死夜及半幸復蘇後二日令再下無老幼盡殺時君已以藝被選而行次安肅矣聞其父死謂人曰我當逃歸葬吾父遂歸求父尸而得之負以涉河水傷脛至血出發母塚下尸而塞之乃還而眾不之覺也嗚呼此其所以爲孝子者歟其子道章資高爽喜讀書而遺山元公陵川郝公皆嘗爲詩文以美之雅善予一日狀其父之孝行訪予於易水之上且曰古者孝友雖庶人得書於史官而先人之孝行若是生無一命之旌而死遂無一言之託以傳不朽爲先人子者亦何以自立於世今謀所以表夫墓惟先生實哀之言已泣數行下嗚呼予尙忍不銘君也哉君諱喜世爲保之清苑人其仕至佩金符其壽四十三其卒則歲乙未閏七月考彥妣喬母兄嘉其所娶實望族韓有婦德鄉里稱爲韓孝婦其壽八十六男女三道昭道章裴氏女寅孫五溫良恭儉讓曾孫四元亞季德昌銘曰嗚呼蹈斧鉞而致死猶淵冰之歸全其死者藐焉此身之微其全者浩乎此心之天有纍雖邱邱者存有圓雖石匪石惟文百世之下有旌古而勵俗者必名此曰孝子之

原過者其式
之孰獨匪人

元李義墓在縣境

劉因明威將軍後衛親軍總管李公先塋碑銘至元十七年丞相伯顏以舊所領諸

將中四人見皇太子曰此皆臣攻江南時渡江水戰攻城略地爲國家盡力命臣所親見者是時天下事聽皇太子處置乃命四人者無外補可使將侍衛親軍仍賜食殿中今致仕後衛總管清苑李公其一也公便騎射材趨過人雖自幼以宦家子從軍爲將校然每喜與士大夫遊且其居近予故聞其勲爵行事也習王戊憲宗南征將兵隸史忠武公至巴州能却敵攻諸柵先登至崇慶卒遇敵江峽奪戰艦中統元年今上北征復將兵隸忠武至吉河三年李壇叛將兵隸張勇烈公圍濟南日夜與賊戰獲賊衆十餘人明年詔河南統軍略地荆南將勇敢分攻堅柵多所克拔九年圍襄陽十一年丞相伐宋爲衛前將至鄂州部所將引戰艦入至郢州夜奪浮橋攻沙陽新城二柵先登渡江將勇敢取水軍首與敵遇取旗戰艦甲仗既渡能盡却所當守岸兵復入江順流追奪至白虎山明年取眞州能退敵焚其舟時敵將夏貴水軍陣巢湖勢不可犯能破其堅奪旗鼓戰艦取常州將勇敢先登拔其城又略定蘇秀二州此其功憲宗時中書右丞相公子清牒爲百戶中統二年璽書遷總把錫以銀符至元十一年軍職例加散官授敦武校尉十三年遷武略將軍錫以金符爲千戶十五年加武德將軍再加宣武將軍爲總管十七年遷明威將軍爲後衛親軍總管後例減總管復爲千戶凡六被

璽書再授符節憲宗南征時詔賞白金一錠北征時今上賞
錦衣一襲圍濟南時親王爲大將者賞白金半錠渡江時丞
相賞馬一匹白金一錠此其爵賞下濟南出誤爲賊所汙者
數十人死拜衛卒讓其同列先已最後補此其行事公知予
習聞是謂予曰凡此皆藉先世今思報効而先塋近在縣之
臨水里考品制得樹碑願刊先世名行使子孫知仁祐今日
者有所自皇考諱義大元開國時從楊甲立柵保南甲爲李
丙所害乃慨然以義動衆共殺丙以復所事讐其衆遂推爲
長後大帥山赤丹略地燕南乃以衆歸之朝廷賜以璽書金
符俾就領其衆爲權府如古留後天下既定乃浮沉里社年
入十二終請書是爲銘予按司馬遷自序多及已蓋史家變
例故公勲爵亦宜附見以榮先世公諱仁祐字安卿男一人
曰元襲公職女一人嫁僉行樞密院事王公之子守銘曰吁
其好還卧榻不容白雁載飛於彬益雄有翼而從咸第其功
南至於江淮北至於沙漠東至於青齊西至於巴庸惟公生
平預折四衝當酬以告其先日疇昔生男不愧矢蓬留後復
讐天亦義之報不在躬彼樂幽崇
龜螭而豐銘以賁之庸壽厥封

明監軍御史諡烈愍金毓峒墓在縣西南金家莊

大清一統志

謹按採訪冊在無我庵前

明尙書諡文毅傅珪墓在縣南傅家莊侍郎馮蘭撰銘

採訪冊

謹按明李東陽撰珪父國子生傅泰墓誌稱傅氏本清苑舊族族最大鄉稱所居第曰傅家莊泰字顯雅弱冠遊保定府學爲生七試京闈連失利成化己亥膺府貢士上禮部陞國子生歷營繕司事乞假歸自號柳莊散人子珪得進士官侍從配劉氏其卒也以宏治庚戌葬府城南祖塋云

明都御史韓文墓在城北二里

雍正志 明宏治十三年諭祭碑文維宏治十三年歲次

庚申八月癸未朔越初七日己丑皇帝遣保定府知府董樸御祭於都察院右副都御史韓文曰爾以醕實之資諳練之識早登科甲擢任行人晉屬他官分領國計屢承任使益著勤能遷少奈有禦民之功居方伯多撫綏之績薦陞都憲久效邊功方當委任之時遽口歸休之請宜優游於晚歲胡一疾以長終爰念賢勞賜葬與祭爾靈不昧庶克欽承李東陽撰神道碑銘頃年聞保定有五老會蓋都御史韓公文及劉公瑀王公道吳公櫝大理卿田公景陽皆謝事家居倣唐宋故事而作大夫士多爲賦詠傳於時未幾口公公口口口口侍郎王公宗彝爲著行狀其子思義介給事中趙君士賢

吏部員外郎馬君闢請予銘刻於神道碑之石予雖未及稔公然同朝舊矣乃按狀敘而銘之公姓韓氏世居保定之新城文其諱貫道其字以府學生舉景泰癸酉鄉貢甲戌入國監天順丁丑登進士第迎養官邸以父喪歸葬壬午授行人歷使湖浙閩洛秦晉諸境成化丁亥以母喪去己丑復任辛卯奉命與給事中一人使琉球賜一品服至則嚴禮度宣德意夷酋敬服歸以所餽儀物籍獻之賜寶鏐若干貫乙未九載考最擢戶部員外郎分督京芻及通州儲糧戊戌進郎中會議分守洮鞏值歲歉安定會寧民羣徙就食公諭遣復業發廩勸貸岷番作亂公出奇兵勦之捷聞有金幣之賜甲辰大饑人相食民流入南山公徧歷山谷隨地賑卹朝廷發漕糧六十萬不時至力疾抵洛亟趨陝州水陸並口口口其耗費若干時戶部侍郎李公衍出賑暨巡撫都御史鄭公時巡按御史陸君淵交章薦公遷右叅政乾州永壽醴泉民將入山至渭不得渡哭聲振野公馳諭使還保以不死措銀口口口又請巡撫發銀數千益之冬寒按察官方城耀州公道見之亟停其役宏治戊申遷右布政使虜寇延慶公督兵擒二百餘人復賜綵幣又築蘭靖邊牆四百里增墩堡二十餘進左布政使通戶所遺地民苦代稅公量民力俾附地代耕歲徵其半以俟歸者又請椎茶易米豆以備儲蓄得二十餘萬三原解夫運官銀懼罪遁去有道獲銀者持納之其爲人畏服至此已酉知鄉貢事綜理嚴密得人爲多庚戌擢都察院右副都御史巡撫寧夏禁山採治兵械甃鎮城若干丈請粥鹽

易粟足支五歲塞山隘七十餘議置花馬池千戶所聽軍士
出馬贖罪有司方奉令捕豹上疏請止之年甫踰六十兩上
疏乞休詔許仍給驛以去己未七月十九日卒壽七十矣公
器宇宏裕質實無偽望之溫然可親而中有介辨其爲政尙
平實期可舉行未嘗肆苛猛立聲譽尤喜好施不爲厚蓄鄉
之人亦多德之祠諱壽考諱通累贈通議大夫都察院右副
都御史祖妣黃氏妣李氏累贈淑人配王氏封淑人子三思
孝義官思忠陽穀縣丞思義國子生女一適奉祀口純口口
口口德清國子生德澄德清女孫三曾孫一公之卒朝廷賜
祭及葬皆如制其墓曰乾山之原以庚申九月二十二日窆
銘曰維古易定王幾之勝生才孔蕃公際其盛英祖作之憲
皇擢之今皇託之若其灼之內則曹省外則藩牧入階憲臺
出鎮邊服饑民告荒公發其藏番夷肆兇公折其鋒未老而
歸孰謂非蚤身名實難惟哲是保口口口口口口口口口口
口口口口口口口口口口口口口口口口口口口口口口
石刻銘敢告行路

明都察院右僉都御史王德明墓在城南

崔銑撰墓誌銘清苑有介士曰王氏

諱德明字宗周性嚴行方特然有守貌莊語簡不輕然諾宏
治甲子年逾冠舉鄉試正德戊辰予以史官閔省試卷累首
薦君主考右南士乃第君以九選封邱知縣是時中官奴廖
鵬附劉瑾威橫於河南民日遭荼毒自三司以下受鵬頤使
欲黨君爲助君不許上司故困君以難平之訟皆理丁卯鵬
子鎧冒祥符籍入試餘姚孫清失官依鵬爲代筆御史輩將

魁鑑君發其奸猶列上第踰年給事中陳鼎劾鑑冒籍除名君以賢調嘉善則易糧長以寬包賠抑勢豪以均田稅有餘力又修治學宮惠養寒士飭武備遂用挫賊於桃源主簿李錫死賊手請於朝蔭其子御史張承仁來按浙大索賂君無所予爲所折抑後御史事敗君名奕奕起在兩縣皆茹菜衣布無受干謁晉戶部主事散儲理鈔不漁貲餘再以艱歸改兵部再晉武選郎中出知懷慶連歲凶君蠲稅已費散積貸粟民旣安和天休聿出瑞麥瑞瓜瑞禾疊產一時上有銀幣之褒晉太常少卿卽晉今官巡撫山西敕於檢身嚴於治吏不得僭乘輜轡濫役民確事實惠抹撥虛泛猾官貪人始不便矣大同之變提兵境上爲聲援已事効僉事孫某棄城脫難將官卻永等納賄賣閑以計獲石州寇常誠心其黨萬人或戮或釋宗人亂法君治之卒爲所陷罷歸臺臣數薦之未及用而卒嘉靖丁酉九月十八日也享年五十有六君始祖元學士王磐諡文忠傳至曰恩者生君贈都御史母楊氏贈安人娶郎氏封安人子三長閭舉人次閭郡學生次文印女二壻指揮謝宸次尙幼孫女一墓在城南葬以某年某月日銘曰嗚呼剛士胡不永年我文而石可久聿堅

明光祿寺少卿諡烈愍張羅彥墓在縣城西南

大清一統志

謹按採訪冊在水堰頭

明孝子劉光顯墓在縣西南吳家灣橋東

府志

明戶部廣西司郎中賈鈞墓在縣東

康熙志 孫季宗撰墓誌銘予視中指數開濟

材梁中丞醺字王少衆振華其選也迺若有梁之易直而大有王之英爽而沉則賈計部太承爲著已數十年來梁死楚王死遼太承名位遜兩公迺其易直而大英爽而沉者直可蔚爲世標太承終里第而實以官卒適予有金革之役不得哭公於位既罷歸乃得按陳太守顯吾所爲公狀系以伯子憲副君所具行實爲銘其誌曰公諱鈞字容甫號太承別號脚怙以捧機初獨奉板輿痛靡瞻也始祖彥明白小興州徙清苑之新莊有隱德七傳而至允中是爲公父以文無害授延慶治粟大使後以公貴累贈奉政大夫娶郭氏爲夔州太守郭公鳳之孫女文學郭公東郊之女初封太孺人累贈宜人歸於賈八年而生公英敏異常兒目過千餘言成誦字復適逸有格及髫補博士弟子員益屹屹爲學不遠千百里負笈問業一時如交河余文端臨朐馮文敏諸先生以文章行業名天下公一造請輒折節爲交其流覽不惜帽篋笥也雅有該通之目予時與家職方卜研隣無慮不心折公丁酉中順天鄉試名在十七前辛卯中如其次遭主司以嫌落是歲當舉首又以經房駱徐陵捐館更置如其次公不復念得雋後先獨念駱先生客死爲綱紀以資南輻大爲主司焦漪園公嘆賞曰是當不負朝廷戊戌罷試入成均執經中涵方先生每以大魁期許尋遠里適贈公以投牒歸公奉贈公暨贈公兄弟一堂融洩不減君實家範無何贈公以偶病逝公痛倉卒頓不起哀毀骨立兩附曲盡心力至產幾罄猶若嗟嗟

因念太宜人春秋高遂一意定省構小齋課憲副君輩學父子兄弟自相師友安肅鄭思成題其堂曰鳴鶴蓋取鶴鳴子和云癸卯伯子登賢書偕上春官屢不售癸丑春伯子錄高第以一語落公更念太宜人急曰奈何以浮榮稽三釜也謁選人得領猗氏猗固九邑而蛾眉嶺踞邑之什七東南浩穰曾不可一舍歲比不登逋責日繁或難之公不謂難曰患人負地耳抵任輒進諸縉紳先生及里中先受坐者叅伍邑里今昔諸大政迺知租胥爲姦利而徭法抗傲也邑田可五萬二千八百餘畝而兩稅四萬一千二百有奇邑故以催租長鳩所部中下戶以次代上公家蓋下里喜不入公牙而長迺喜代爲籍一入手輒沒爲橐中裝或以癡代黠長飽欲死矣卽官無納響而邑有逋聲公初嚴鳩收之禁分十八限刊糧牒如其限按牒牒注滿額卽罷不比而賦漸如額口錢可七千金而丁纔萬二千猗固喜加差不喜加門長吏徇之遂至加單丁錢五倍公念目不識乏饒而憚南金之口高下此萬餘人將踐更之卒日集單赤而代饒爲役於是屏車徒親歷山谷爲明保甲計耦耕卽以所歷郵掾手奏其田廬戶口之饒之數及編次戶牒並叅諸口奏者定徭高下而時撫其匿弗承詭弗核者悉數其丁年產目而徭以均漸輕公嚴明不令人以私干而恕行之故情行於法嘗手奏獄要無稽牒無呼暑至鏤金不足抵穀積乃割俸抵之諸大吏檄覆州邑所上訟牒無不願就猗令者大盜久逋出沒梁晉間公輒受文略購獲無遺旣念學宮圯不治損一歲俸爲倡得後先輸金三百餘公人授事閱三月而學成乃進邑庠諸弟子員及偕

司庫四百五十餘人庭比之其甲乙百不失一所比高等相
次後先得雋中更有拔之茗華者三晉固遜材郇瑕而公復
雅意作人一時文彩英英相映其調饑佐娶啁啾頌德矣會
入覲當留諸父老子弟計不得借則聚族爲報祠尸祝之猗
長吏去多不及政公獨以累薦得封兩尊人如秩太宜人明
璫霞帔令君牽子姓上伯千壽人都授大理寺評事遽遭太
宜人老病卽世公扶櫬還里哀毀如喪太公病幾殆後迺益
綜核文武大略爲開濟天下遠計曰是可以報吾君卽可以
報吾親辛酉服闋補原官以光宗登極恩改贈兩尊人如京
秩逾年轉右寺副遇今上登極恩加贈太公爲儒林郎太孺
人爲安人又逾年轉本寺左寺正是時諸疆吏在大譴大呵
之域者司讞方聽熒於操縱而衡律者或低回於不經不辜
公執法如山見無禮於君者嚴之不少貸卽要人撼以危語
三尺屹如也迺屏脆失入若冤僕若疑盜若戲稚比部論大
辟者力相參駁不厭平反云大廷尉范滂初極器重之尋擢
戶部廣西司郎中以皇長子誕恩加贈太公爲奉政大夫郭
安人爲宜人蓋兩載三遷三逢大典殆公所謂報吾君卽報
吾親也是時李太宰崧毓爲大司農一見輒傾心相倚任每
大議難決必趣公至而後定都人苦僉商更苦十庫商以司
鑰不可問而私應爲艱纔登牒輒蕩然有殍公惻然條上大
司農爲都人請命得補牘請罷報可壩上諸倉額馬多不充
而芻糗爲繁時省臺建議決去浮冗諸曹卽以累怨難任格
不行公毅然立爲題覆裁減各馬房欸段百有奇歲省幾千
金又爲題減酒醋局麥豆二千八百有奇歲又可省三千餘

金旣念輦轂下依日月光際上有大澤必先之何忍見道殣
溝瘠則愆憫諸御史臺各捐庫貯問架錢置綿繻萬給諸貧
賈蒙袂者公旣負開濟大志故居平屹屹爲學又屹屹爲吏
積瘁而病加以醫庸病日加亟請休於大司農不可乃爲題
請予六月假扶病歸四浹旬而逝矣遺囑爲宗黨戚族計安
全語甚晰公坦粹沉毅刻意以聖賢自律而和易之氣映人
眉宇予每相晤語輒自覺謏薄如遇黃叔度云其孝友篤摯
故嘗受經於伯易庵事易庵如贈公及易庵之子利甫卽世
事易庵更切叔明庵弗良於視而未嗣公事明庵不異易庵
拊兩妹子如子事伯叔母如母屬續時猶令剖祖田分給兩
家子弟乃其恬淡絕不復求田問舍性復儉樸不飲酒然謹
集殊鮮腆而不爲流連歲時伏臘如禮聚族而餞時振其緩
急室無妾媵自其少壯無聲色之娛性嗜書史每歲務涉二
十一史十三經註疏一過得其大義左傳一編及毛箋尤以
本業精研著有左解鳴鶴堂詩意彙有菽苑英華一冊旁涉
老莊管韓呂覽及楞嚴天機諸經手自刪纂故善爲古文辭
下筆千言立就詩宗少陵諸所著記憲副君將以公命名家
藏集類錄以質于古云公初配趙恭人爲新莊之東劉家口
人于歸十年而逝生而端靚寡言笑不喜華飾旣歸更爲勤
樸兢兢爲孝敬王母趙孺人其祖姑也性嚴重御子媳時有
所呵讓恭人獨以淑慎得其懽心王母無不解顏憐愛之聞
以內合炊可數百指恭人上事下接以孝敬佐公曲得其當
主簿公性好客郭宜人病不任中饋恭人輒身代之手調所
庋閣以奏其纂組女紅又復代郭宜人以事趙王母無慮不

一一精好愜王母意主簿公喜曰佳哉幹婦吾門其興矣十
八歲卽舉憲副君於主簿爲元曾孫尙有高王母于孺人在
堂重帷五世倍勝郭宜人之在郇也越明年公入類恭人解
佩以佐壯遊歸來輒舉所師友告恭人又輒力贊之曰以君
凌霄之姿自足致身青雲第當大父母未老時蚤奮雲霄更
快人意耳公固自嗜學每篝燈夜讀不雞鳴不休恭人每辟
績佐之無勸色當試前曰小捷也當試不前曰小挫也公聞
而益感憤向學銳然以大儒自期迄成名以至服官中間苑
枯悲喜恭人盡以兩試意勉解蓋具有遠識云將逝之夕公
掩泣向恭人曰子予之益友也子誤子恭人拊膺太息曰君
千里才甯有長貧賤者獨憾薄命不一見耳兒女子實累君
君其教之勿貽泉下人羞憲副君每舉語及之未嘗不涕覆
面也公生嘉靖四十四年三月二十四日寅時卒天啟四年
五月初六日申時得年六十元配趙氏先以公考猗氏績贈
孺人嗣以伯子憲副考戶部主事滿加贈安人再以進秩卽
中逢光皇帝登極恩加贈宜人又以擢陝西叅議逢今上登
極恩加贈恭人時以公方同朝獨得贈母例也生嘉靖四十
一年九月初九日午時卒萬曆十四年十月二十五日戌時
得年二十有五繼配張氏安州庠生張養正女封孺人累封
恭人如趙恭人例嗣君旣以天啟五年四月初八日葬公於
東阡祖塋啟西原趙恭人祔焉越明年二月予迺爲公銘銘
曰嗚呼通或以宛貞或以選挫銳解紛見吾叔度不競不綈
不茹不吐解薛郇陽法難悉索擷法調人捐煩去熇亦旣樂
只載規載約入衡玉律大憲方勅山如其執旭如其明郵罰

麗事天下之平彼都人士繁嬌孔極既甦其徭載解其繯攬
鋒剔蝨惠我京國大業未竟以遺後人凌霄勁翮蔚爾名臣
於昭百世
視此貞珉

明尚書李友直墓在城東喇喇地有大學士楊士奇撰墓誌
採訪
冊

明尚書高耀墓在城東空城上

明都督僉事張純臣墓在城西水堰頭上

明鎮守昌平總兵都督同知常宏軒墓在金家莊一云在馬

車村北

同上

明夔州太守郭鳳墓在城北雪稼莊上

同上

明三十六忠義之墓在清河道署內同治十年清河道溧陽

陳鼐修葺道署立石表墓

同上 陳鼐題墓表前明崇禎甲申李自成犯京師連陷正定河間

保定進士張繼俊與其弟光祿寺少卿羅彥文學羅善羅詰
武進士羅輔知府何復同知邵宗元等糾鄉勇二千人堅守

月餘殺賊萬餘人三月十九日京師陷越六日賊臣李建泰內應賊保定陷張氏婦孺死者二十有三人鄉勇相率巷戰死之或哀忠骸三十六人叢葬署後高原同治辛未鼎分巡是邦爲立廟而表其墓惜逸其姓氏不獲史官列傳而其人其事足以風矣

國朝太子太保謚文清內閣學士郭棻墓在城西南金家莊上同

國朝山西道監察御史石維崑墓在金家莊上同

國朝刑部員外郎何秋濤墓在縣西馬池村同上年撰墓表嗚呼此

吾故人何君願船墓也同治元年彭年自燕之蜀君代爲蓮池書院院長比入蜀聞君喪逾十年重來蓮池始知君之旅葬於此悲夫君諱秋濤願船其字世居福建光澤福民坊祖長敦直隸博野縣知縣考高華國子監生君少負異稟過目成誦自爲兒時能舉天下府廳州縣名數其四境所至年二十舉於鄉逾年試禮部爲貢士又逾年殿試授刑部主事益廣交遊博覽傳記學乃大進道光中京師言宋學者則有倭文端公會文正公何文貞公吳侍郎廷棟邵員外懿辰

丁郎中彥儔言漢學者則有何編修紹基張州判穆苗貢生夔及君鄉人陳御史慶鏞言古文詞者則有梅郎中曾亮朱御史琦王都御史拯馮按察志沂君專精漢學而從諸公遊處未嘗以門戶標異其於經史百家之詞事物之理考證鉤